

## ¡POLA ENSEÑANZA PÚBLICA!

Les organizaciones convocantes aspiramos lexítimamente a que la educación pública asturiana asiente les bases d'un progresu social cohesionáu qu'afite los principios d'igualdá d'oportunidaes y xusticia social. Trabayamos pa que la nuestra enseñanza pública non solo apurra conocimientos académicos, sinón que contribuya a la formación de ciudadanes y ciudadanos críticos y comprometíos col bien común. La educación pública asturiana ye una cuestión de toos y de toes.

El Gobiernu d'Asturies nun ta dando a la educación pública nin la importancia nin los fondos que merez. Lo contrario, sigue apostando por subvencionar con dineru públicu la enseñanza privada al traviés de los concertos educativos. Instalóse una política educativa del artificiu, del marketing, d'anuncios ensin conteníu y reuniones ensin compromisos. Llamentablemente, demuéstrase colos fechos, que'l Gobiernu del Principáu considera que'l dineru dedicáu a la educación pública ye un gastu en bona medida prescindible y non una inversión xusta, necesaria y rentable de verdá. Ye inaceptable que les restricciones presupuestaries sirvan de manera recurrente de disculpa pa nun cumplir lo prometío.

La comunidá educativa desenvolvió a lo llargo d'esti cursu escolar movilizaciones, reivindicando un procesu de negociación qu'algame compromisos p'ameyorar la enseñanza pública asturiana.

### PIDIMOS:

- Un alcuertu nuevu de plantiyes que dote a los centros de los recursos humanos necesarios, que permita que tol profesoráu tea nel so centru dende'l 1 de setiembre, que desanicie les medies xornaes y qu'amenorgue'l númberu d'alumnos y alumnes nes aules. L'Alministración sigue ensin encarar un problema estructural y incumple la llei, porque en nengún casu va baxar la tasa d'interinidad al 8%
- La mengua de la burocracia pa disponer de más tiempu pa la docencia, la innovación y la investigación. L'amenorgamientu de la carga lectiva para disponer de más tiempu p'acciones imprescindibles nel ámbitu educativu como l'acción tutorial y la coordinación y seguir avanzando escontra una atención más individualizada, tal como esixe la LOMLOE y como ratificó'l Conseyu Escolar del Estáu.
- La implantación del ciclu de 0 a 3 años con una xestión totalmente pública, ensin concertación y con calter universal, de baldre y educativu y, por tanto, la so plena inclusión na Conseyería d'Educación. El proyectu clave de la llexislatura va camín de quedar en nada porque siguen ensin resolverse les cuestiones llaborales y la organización de les escueles; eso que la Conseyera denominó "trabayu finu" y que toos y toes sabemos que ye lo principal y la clave del ésitu de la medida, porque nada va salir bien si empioren les condiciones llaborales de los trabayadores.
- Dotación a los centros públicos de los recursos necesarios pa que sían espacios seguros y saludables.
- Un programa de formación permanente del profesoráu dientro del horariu lectivu que-y permita encarar los retos educativos del sieglu XXI nes meyores condiciones posibles.



Pidimos, a última hora, la dignificación del oficio docente. Que se reconozca la profesionalidad y el bon desempeño del profesoráu asturianu que, inaceptablemente, ye'l peor pagu del país. Ye hora d'acabar con ataques absurdos y inxustificaos qu'estropien la so imaxe y la so valía y llograr una reconocencia real, efectiva y d'acordies cola responsabilidad del oficiu docente.

La respuesta de la Conseyera d'Educación foi nun comprometese a nada que supunxera una inversión económica. Les reclamaciones sindicales, lloñe de resolverse, siguen presentes y surdieron problemes nuevos onde nun los había, como nel serviciu d'inspección, los Centros de Profesores y Recursos, el tresporte o los comedores escolares. El gobiernu asturianu dedícase a vender fumu y a atribuyise méritos que nun-y correspuenden, pos les reconocencies del alumnáu de la enseñanza pública pertenecen a los y les estudiantes, al profesoráu y a les sos families.

Les necesidaes de la escuela pública siguen ensin cubrir pero dedíquense nos presupuestos d'anguaño 105 millones d'euros para caltener el negociu de la rede privada-subencionada.

Sra. Conseyera, pa que la educación pública asturiana ameyoreprecísase dotala de medios económicos, humanos y materiales abondos, y esta inversión tien de ser siguida y tien de garantizar el serviciu más allá de les aportaciones extraordinaries procedentes de los fondos europeos.

Sra. Conseyera, la educación pública ye un derechu fundamental y un pegollu básicu del bienestar. La educación pública tien de ser un apueste prioritariu porque ye la única que garantiza al alumnáu y a les families oportunitadaes y resultaos n'igualdá.

Sra. Conseyera, los programes electorales cúmplense o los sos responsables políticos dimiten.

Énte la falta de diálogu y compromisos, la comunidá educativa asturiana alza la voz en defensa de la enseñanza pública asturiana. Les madres y los padres esmolecíos polos sos fíos y fíes, el profesoráu comprometíu col so llabor, l'alumnáu y tola sociedá polo xeneral esiximos un compromisu firme de los y les responsables polítiques cola enseñanza pública asturiana.

